

Զանգեզուրում օղեքաշությունը ժողովրդի բարօրության մեջ մի այնպիսի խոշոր աղբյուր չէր, ինչպիսին էր այդ ճշուզը կենսային Ղարաբաղում, որտեղ արտահանվող արտադրանքների մեջ օղին բռնում էր առաջնակարգ տեղերից մեկը: Օղին քաշում էին ջջից⁹³, վայրի պտուղներից, բայց առավելագույնը թթից՝ զուտ տեղական գործածության համար: Թեև Զանգեզուրի անտառները հարուստ են վայրի պտուղներով, օրինակ՝ հունավ, այնուամենայնիվ, օղին գերադասում են քաշել թթից:

Քաշելու սարքավորումը շատ պարզ ձև ունի: Մի քանի հասարակ քարերով կազմված օջախի կրակի վրա դրվում է կոնաձև դազան. նրա վրա որպես կափարիչ ծածկվում է կիսակլոր պղնձե քաղար, որի գլխին ամրացված է «Ռ» գլխատառի ձև ունեցող լայն խողովակ: Եփվող թթի գոլորշիները փոխադրվում են երկու կոնաձև՝ երկու ծունկերով, կոններով 1,5-ից մինչև 2 մետր երկարություն և 7—8 սմ տրամագիծ ունեցող հորիզոնական լնիլան՝ խողովակը: Լնիլան զետեղվում է փայտե նովի՝ նավի մեջ, երբեմն ուղղակի աղբյուրից հանած առվակի մեջ, որտեղ շարունակ հոսող ջուրը սառեցնում է գոլորշիները և արդեն պատրաստի արաղը լնիլայի ծայրից կաթկթում է տակը դրված որևէ ամանի մեջ: Ամբողջ սարքավորումը պղնձից է:

Մի ամանից մյուս ամանը թե՛ օղին և թե՛ առհասարակ որևէ հեղուկ՝ գինի, ձեթ, նավթ ածելու համար գործ է ածվում պղնձե ձագար՝ ռահաթի:

ԱՆԱՍՆԱՊԱՀՈՒԹՅԱՆ ՀՈՒՄՔԻ ՎԵՐԱՄՇԱԿՈՒՄ

Կ Ա Ք Ն Ա Տ Ն Տ Ե Ս Ո Ւ Թ Յ Ո Ւ Ն

Եթե ոչխար կթելը թույլ էր տրվում և տղամարդուն՝ շօբանին, ապա կով կթելը զուտ կանացի գործ էր, ինչպես և կաթի ամբողջ վերամշակումը: Այստեղ էլ պիտի որոշ մագիկ միջոցներ ձեռք առնվեին, որ կովը շատ կաթ տար, որ կաթնատվությունը երկար տևեր, որ կաթի յուղայնությունը մեծ լիներ և այլն: Այսպես՝ թույլ չէր տրվում կովերի մեջ մեկը ման գա դատարկ ամանը ձեռքին՝ կաթը կպակասեր կամ անասունի մեջ վարակիչ հիվանդություն: Կրնկներ և տերը կմնար դատարկ: Կովի կողքին կրակ չպիտի վառվեր, որովհետև կաթ տալուց կդադարեր, կչորանար: Եթե կթելիս մի մարդ մտներ և կաթը քիչ կթվեր՝ այդ մարդը կդիտվեր որպես ծանր վտանգ ունեցող և նրանից խույս պետք էր տալ և ներս չպետք էր թողնել թե՛ կով կթելիս և թե՛ խնօցի հարելիս:

Կաթը կթում էին քթեճի կամ բաղիայի և փաթիլի մեջ: Կթելուց հետո քամում էին բամբակի թելից գործած կրթնիքամի օգնությամբ: Եթե ուզում էին, որ կաթը միշտ առատ լինի՝ Համբարձման օրը հավաքում էին խոտերի վրայից առավոտյան ցողը և ավելացնում կաթի վրա: Այդ օրը նվիրված էր հենց կաթին: Այդ օրվա ամբողջ կաթը բաժանում էին աղբատների մեջ: Այսպիսով, առատաձեռնությամբ խրախուսում էին նաև բնության գաղտնի ուժերի առատաձեռնությունը: Այդ նախնական մտածողությունից բխում էր նաև մի այլ սովորություն, որը նպատակ ուներ առատաձեռնությամբ կաթի առատությունն ապահովելը: Նոր ծնած կովի առաջին օրվա կաթը եփում էին առանց

⁹³ Մզած խաղողի մնացորդներից՝ ճան, ճանա: Մեղրու բարբառով՝ ճեճը: